




Turn- und Sportverein 1898 Olsbrücken e.V.

KERWEREDD 2013



www.tus-olsbruecken.de

2,00 €

AfD-Wähler können
ersatzweise 3,91 DM bezahlen

Begrüßung

Ihr liebe Leit un Kerwegäscht,

es Lebe, das ist net gerecht.

Vor zwä Woche hämmer alle entschied,

wer uns fer die näggschde 4 Jahr es Geld aus de Tasche zieht.

Wer von Volkes Stimme ernannt,

unser Steuermilliarde setzt in de Sand.

Wissen er was? Es is grad egal,

mir han zwar gewählt, awwer hatten kä große Wahl.

Zum Glück hammer Kerb, fer uns abselenke,

un des Trauerspiel mit Bier un mit Woi zu ertränke.

Mei Mundschenk darf mer jetzt es Weinglas reiche,

während die Straußborsch und Straußmäd die Kerb okreische.

So, das hänner gut gemacht,

jetzt isses Zeit, wer hät's gedacht,

dass ich e Sprosse höher laaf,

und endlich denne Strauß do daaf.

Die Musik spielt, ihr kennens jo,

„Die Olschbrigger Kerb, die Olschrigger Kerb is do“

Thema 1: Die Rote kumme

Um a glei politisch se bleibe,
will ich eich folgendes unner die Nas noch reibe.
Die Rote, die sin stark im kumme,
net ubedingt bei de Wahle, awwer dovor do unne -
Unserm Tormann vun de Erscht is a „Rote-Karte-Hattrick“ gelunge.
3 Spiele hinnenanner – also unnerbroch vun de Sperre –
Issem de Gaul dorsch gang – werre un werre.
Er is halt emotional, was will mer mache,
beim Fußball genauso wie beim herzhafte Lache.
Ich det em jo zu änem Anti-Aggressions-Training rote,
han awwer Angscht, do gäbs dann Tote.

Johannes, dir singt unser Chor,
von Wencke Myhre „Er steht im Tor“

Thema 2: Frontladereinsatz

Die Generationengerechtigkeit werd bei uns gewahrt,
desweh is die nägschd Geschicht vun änem ältere Kamerad.
Freitags wird bei dem im Sportheim Schofkopp gekart,
am Wocheend macht er ab un zu e kläni Spazierfahrt.
Er saht noch Tschüss zu seiner Frah,
paar Meter weiter is de Friedel wortwörtlich in de Holzgrabe gefahr.
Er hat bei seinem Sohn e Hilferuf abgesetzt,
de Heiko is mit seinem Quad dann hinner gewetzt.
Mim Quad wollt der sei Vadder aus em Grabe ziehe,
dut do debei awwer nur die Stoßstang verbiehe.
Sie han schweres Gerät gebraucht, so viel war klar,
also ab bei de Litze uff die Hazienda.
Der hat de Schlacki ins Spiel gebrung,
der schließlich is mim Frontlader kum.
Der hat dann mit agrarischer Kraft
em Friedel sei Auto aus em Grabe geschafft.

Die Musik spielt dir mit viel Trab

„Friedel, ich hol dich mit dem Traktor ab“

Thema 3: De Puscher

Eich isses bestimmt ah schummo bassiert,
dass ner eich han in e peinliche Situation manövriert,
es dut änem dann jo a immer läd,
wammer in so e schönes Fettnäpfche tret.
Glawe mer, ich wäiß wovon ich sprech,
ich selber hat vor kurzem nämlich das Pech.
Bei meiner Frah ihrer Tante zum Gebortsdach ingelad,
ging zum Grille no Wolfstäh die Fahrt.
Zu späterer Stunde, es hat schun leicht im Kopp gebitzelt,
hat äner vun de Gäscht zu mir gewitzelt:
„Benni, gehsche morsche beim Dr. Bubel e Gelber hole?“
Woruf ich spasseshalber johle:
„Bei denne Puscher geh ich net!“
Dem Gascht isses Lache aus'm Gesicht gefall,
un er hat energisch sei Kopp no rechts gehal.
In dem Moment han ich gewisst,
wer dann eigentlich mei rechter Sitznachbar ist.

Die Straußborsch un –Mäd singen mir fer lau,
„Oi oi oi oi oi oi oi, au wau wau wau wau“

Thema 4: De Paukeschlag

Die Ohrequäler vun dort unne,
han des Johr mo werre in unser Kerweredd gefunne.
Mer kennts a e Joint-Venture nenne,
der Protagonist dut a gern ins Sportheim renne.
In der Geschicht isser mit em CSG Krach mache gefahr,
Musik det ich jetzt net ubedingt sah.
Mei Meinung hat dort offenbar e Schäferhund geteilt,
un is uff de Fuzzy zugeeilt.
Das arme Tier hat Notwehr ergriff,
un de Fuzzy ordentlich in de Arsch gebiss.
Als ehemaliger Tormann net grad gezügelt,
hat de Fuzzy denne Hund mit seinem Paukeschlägel verprügelt.

Die Musik spielt jetzt dem Rabauke,
„Heute haun wir auf die Pauke“

Thema 5: Hochzeitsgeläut / Verpoltert

Es gebbt awwer a noch schönes uf de Welt,
so han des Johr diverse mo die Hochzeitsglocke geschellt.
Un zu denne ganze Feschte, geb ich jetzt noch was zum Beschte.
An unserm Polterowend, ich han grad gekehrt,
han uns e paar Iwwerraschungsgäscht beehrt.
Ich han erscht gedenkt, die gehen zu meiner Frah,
bis die zu mir kumm is un hat gesah:
Wer issen das? Die sin mer ganz fremd.
Derweil sin die zwä schun zum Haufe gerennt,
han ufgeschmiss ihr ganzes Gescherr,
un mich dann gefroht, wer ich dann wär.
„De Bräutigam“ sah ich verwunnert,
do han se geguckt wie e Schoof wanns dunnert.
„Das kann net sin“ hat der Mann dann gesah,
do war die Sach mir langsam klar.
Die zwä wollten beim Sascha Ziegler uffs Fescht
Un warn e Stroß zu frieh gewescht.
E halber Teller han se noch vum Haufe gefischt
un sin dann riwwer zum Sascha gezischt.
Mir singen Euch beim Gehen „Schönen Gruß, auf Wiedersehen“

Thema 6: Aktenzeichen XY - eingedöst

Ich muss eich sahe, zum End meiner Redd:

Es hat in Olschbrigge e ungelöster Mordfall gebb.

Wie bei Aktezeiche XY würd ich erstrebe,

das Ihr mer sachdienliche Hinweise gebe.

De Tatort, der is ganz in de Näh

vun de Pälzer Waldhütt geleh.

Am Tatabend is e Zeuge – ich nenn ne mo Kall,

mit de Sternlamp uff em Kopp vum Lottofest häm gefall.

Unnerwegs hat er sich furchtbar erschreckt,

er hat im Stroßegrabe nämlich e Leich entdeckt.

Er wollt schun fascht die Polizei herbei rufe,

hört dann aus em Grabe e leichtes Fluche.

Es Opfer wurde offenbar vergiftet,

mit Weinschorle buchstäblich hingerichtet.

Die Pathologie hat auf folgendes verwiesen:

Ein Suizid ist nicht auszuschließen.

Ich hoff dass äner vun eich denne Fall bald löst,

das war's heit vun Aktezeiche XY – eingedöst.

Verabschiedung

Ihr liebe Leit, das wars fer heit,
feiern noch schä, awwer treibens net zu weit.
Bevor ner nuff zum Kerweplatz wetze,
wers schä wanner eich noch e bissje ins Sportheim setze.
Trinken dort e paar Kerweschoppe,
bevor ner eier Geld fer Boxautochips verkloppe.
Fer Zwä Euro kenne ner noch e Kerweredd kaafe,
dodevor losse mir noch e Meter Alt rinlaafe.
Un heben eich bis Montag a paar Monete uff,
die brauche ner beim Frühschoppe fer eier Suff.

Jetzt schaffen eich rin, gebben aus eier Geld,
die Olschbrigger Kerb is die schennscht vun de Welt!

Autor & Kerweredner:

Benjamin da Silva Moreira (geb. Gehm)